

摛藻堂四庫全書薈要

史部

欽定四庫全書
舊要卷四千九百七

史部

北史卷九十六

唐 李 延 壽 撰

列傳第八十四

氏 吐谷渾 宕昌 鄧至 白蘭

党項 附國 稽胡

氏者西夷之別種號曰白馬三代之際蓋自有君長而世一朝見故詩稱自彼氐羌莫敢不來王也秦漢以來

世居岐隴以南漢川以西自立豪帥漢武帝遣中郎將
郭昌衛廣滅之以其地為武都自汧渭抵於巴蜀種類
實繁或謂之白氏或謂之故氏各有侯王受中國封拜
漢建安中有楊騰者為部落大帥騰勇健多計略始徙
居仇池方百頃為號四面斗絕高七里餘蟠道三十六
回其上有豐水泉煮土成鹽騰後有名千萬者魏拜為
百頃氐王千萬孫名飛龍漸強盛晉帝假平西將軍無
子養外甥令狐茂搜為子惠帝元康中茂搜自號輔國

將軍右賢王羣氏推以為王關中土人流移者多依之
愍帝以為驃騎將軍左賢王茂搜死子難敵統位與弟
堅頭分部曲難敵自號左賢王屯下辨堅頭號右賢王
屯河池難敵死子毅立自號使持節龍驤將軍左賢王
下辨公以堅頭子盤為使持節冠軍將軍右賢王河池
公臣晋晋以毅為征南將軍三年毅族兄初襲毅毅并
有其衆自立為仇池公臣於石季龍後稱蕃於晋永和
十年改初為天水公十一年毅小弟宋奴使姑子梁三

王因侍直手刃殺初初子國率左右誅三王及宋奴復自立為仇池公桓溫表國為秦州刺史國子安為武都太守十一年國從叔俊復殺國自立國子安叛苻堅殺俊復稱蕃於晉死子世自立為仇池公晉太和三年以世為秦州刺史弟統為武都太守世死統廢世子纂自立一名德聚纂黨襲殺統自立為仇池公遣使詣簡文帝以纂為秦州刺史晉咸安元年苻堅遣楊安伐纂剋之徙其人于闕中空百頃之地宋奴之死二子佛奴佛

狗逃奔苻堅堅以女妻佛奴子定拜為尚書領軍苻堅之敗關右擾亂定盡力於堅堅死乃率衆奔隴右徙居歷城去仇池百二十里置倉儲於百頃招夷夏得千餘家自稱龍驤將軍仇池公稱蕃於晉孝武即以其自號假之後以為秦州刺史登國四年遂有秦州之地號隴西王後為乞佛乾歸所殺無子佛狗子盛先為監國守仇池及統事自號征西將軍秦州刺史仇池公謚定為武王分諸氏羌為二十部護軍各為鎮戍不置郡縣遂

有漢中之地仍稱蕃于晉天興初遣使朝貢詔以盛為
征南大將軍仇池王隔礙姚興不得歲通貢使盛以已
子撫為平南將軍梁州刺史守漢中宋永初中宋武帝
封盛為武都王盛死私謚曰惠文王子玄統位玄子黃
眉號征西大將軍開府儀同三司秦州刺史武都王雖
蕃於宋仍奉晉永熙之號後始用宋元嘉正朔初盛謂
玄曰吾年已老當終為晉臣汝善事宋帝故玄奉焉玄
善於待士為流舊所懷始光四年太武遣大鴻臚公孫

軌拜玄為征南大將軍督梁州刺史南秦王玄上表請
比內蕃許之玄死私謚孝昭王子保宗統位初玄臨終
謂弟難當曰今境候未寧方湏撫慰保宗冲昧吾授卿
國事其無墜先勲難當固辭請立保宗以輔之保宗既
立難當妻姚氏謂難當曰國嶮宜立長君反事孺子非
久計難當從之廢保宗而自立稱蕃于宋難當拜保宗
為鎮南將軍鎮宕昌以次子順為鎮東將軍秦州刺史
守上邽保宗謀襲難當事泄被繫先是四方流人以仇

池豐實多往依附流人有許穆之郝惔之二人投難當
並改姓同馬穆之自云名飛龍惔之自云名康之云是
晋室近戚康之尋為人所殺時宋梁州刺史甄法護刑
政不理宋文帝遣刺史蕭思話代任難當以思話未至
遣將舉兵襲梁州破白馬遂有漢中之地尋而思話使
其司馬蕭道成先驅進討所向剋捷遂平梁州因又附
宋難當後釋保宗遣鎮董亭保宗與兄顯歸京師太武
拜保宗征南大將軍秦州牧武都王尚公主保顯為鎮

西將軍晉壽公後遣大鴻臚崔頤拜難當為征南大將軍儀同三司領護西羌校尉秦梁二州牧南秦王難當後自立為大秦王號年曰建義立妻為王后世子為太子置百官具擬天朝然猶貢獻于宋不絕尋而其國大旱多災異降大秦王復為武都王太延初難當立鎮上邽太武遣車騎大將軍樂平王丕等督河西高平諸軍取上邽又詔喻難當奉詔攝守尋而傾國南寇規有蜀土襲宋益州攻涪城又伐巴西獲維州流人七千餘家

還于仇池宋文帝怒遣將裴方明等伐之難當為方明所敗棄仇池與千餘騎奔上邽太武遣中山王辰迎之赴行宮方明既剋仇池以保宗弟保熾守之河間公齊擊走之先是詔保宗鎮上邽又詔鎮駱谷復其本國保宗弟文德先逃氐中乃說保宗令叛事泄齊執保宗送京師詔難當殺之氐羌立文德屯于濁水文德自號征西將軍秦河梁三州牧仇池公求援于宋封文德為武都王遣偏將房亮之等助之齊逆擊禽亮之文德奔守

葭蘆武都陰平氏多歸之詔淮陽公皮豹子等率諸軍
討文德走漢中收其妻子寮屬資糧及保宗妻公主送
京師賜死初公主勸保宗反人問曰背父母之邦若何
公主曰禮婦人外成因夫而榮事立據守一方我亦一
國之母豈比小縣之主以此得罪文成時拜難當營州
刺史還為外都大官卒謚曰忠子和隨父歸魏別賜爵
仇池公子德子襲難當爵早卒子小眼襲例降為公拜
天水太守卒子大眼別有傳小眼子公熙襲爵正光中

尚書右丞張普惠為行臺送租於南秦東益普惠啓公
熙俱行至南秦以氐反不得進遣公熙先慰氐東益州
刺史魏子建以公熙嶮薄密令訪察公熙果有潛謀將
為叛亂子建仍報普惠令其攝錄普惠急追公熙公熙
竟不肯赴東出漢中普惠表列其事公熙大行賄賂終
得免罪後為假節別將與都督元志同守岐州為秦賊
莫折天生所虜死於秦州文德後自漢中入絕汎隴遂
有陰平武興之地後為宋荊州刺史劉義宣所殺保宗

之執也子元和奔宋以為武都白水太守元和據城歸順文成嘉之拜征南大將軍武都王內徙京師元和從叔僧嗣復自稱武王於葭蘆僧嗣死從弟文度自立為武興王遣使歸順獻文授文度武興鎮將既而復叛孝文初征西將軍皮歡喜攻葭蘆破之斬文度首文度弟弘小名鼠名犯獻文廟諱以小名稱鼠自為武興王遣使奉表謝罪貢其方物孝文納之鼠遣子狗奴入侍拜鼠都督南秦州刺史征西將軍西戎校尉武都王鼠死

從子後起統位孝文復以鼠爵授之鼠子集始為白水
太守後起死以集始為征西將軍武都王集始復朝于
京師拜都督南秦州刺史安南大將軍領護南蠻校尉
漢中郡侯武興王賜以車旗戎馬錦綵繒纊尋還武興
進號鎮南將軍加督寧湘五州諸軍事後仇池鎮將楊
靈珍襲破武興集始遂入齊景明初集始來降還授爵
位歸守武興死子紹先立拜都督南秦州刺史征虜將
軍漢中郡公武興王贈集始車騎大將軍開府儀同三

司謐安王紹先年幼委事二叔集起集義夏侯道遷以
漢中歸順也梁白馬戍王尹天保率衆圍之道遷求援
於集起集義二人貪保邊蕃不欲救之唯集始弟集朗
心願立功率衆破天保全漢川朗之力也集義見梁益
既定恐武興不得久為外藩遂扇動諸氏推紹先僭稱
大號集起集義並稱王外引梁為援安西將軍邢巒遣
建武將軍傅豎眼攻武興剋之執紹先送于京師遂滅
其國以為武興鎮復改鎮為東益州前後鎮將唐法樂

刺史杜纂邢豹以威惠失衆氐豪仇石柱等相率反叛朝廷以西南為憂正光中詔魏子建為刺史以恩信招撫風化大行遠近款附如内地焉後唐永代子建為州未幾氐人悉反永棄城東走自此復為氐地魏末天下亂紹先奔還武興復自立為王周文定秦隴紹先稱藩送妻子為質大統元年紹先請其女妻周文奏魏帝許之紹先死子辟邪立四年南岐州氐苻壽反攻陷武都自號太白王詔大都督侯莫陳順與渭州刺史長孫澄

討降之九年清水氏首李鼠仁據地作亂氏帥梁道顯
叛攻南由周文遣典籤趙昶慰諭之鼠仁等相繼歸附
十一年於武興置東益州以辟邪為刺史十五年安夷
氏復叛趙昶時為郡守收首逆者二十餘人斬之乃定
於是行南秦州事氏帥蓋闇等作亂闇據北谷其
黨西結宕昌羌獠甘共推蓋闇為主昶分道遣使宣示
禍福然後出兵討之禽蓋闇散其餘黨興州叛氏復侵
逼南岐州刺史叱羅協遣使告急昶起救又大破之先

是氏首楊法深據陰平自稱王亦盛之苗裔也魏孝昌
中舉衆內附自是職貢不絕廢帝元年以深為黎州刺
史二年楊辟邪據州反羣氏復與同逆詔叱羅協與趙
昶討平之周文乃以大將軍宇文貴為大都督興州刺
史貴威名先著羣氏頗畏服之來歲楊法深從尉遲迴
平蜀軍迴法深尋與其宗人楊崇集楊陳坐各擁其衆
遞相攻討趙昶時督成武沙三州諸軍事遣使和解之
法深等從命乃分其部落更置州郡以處之恭帝末武

興氏反圍和州鳳州固道氏魏天王等亦聚衆響應大將軍豆盧寧等討之周明帝時興州人段吒及下辨柏樹二縣人反相率破蘭臯成氏酋姜多復率厨中氏屬攻陷洛聚郡以應之趙昶討平二縣并斬段吒而陰平葭蘆氏復往屯聚與厨中相應昶乃簡精騎出其不意徑入厨中至大竹坪連破七柵誅其渠帥二郡並降及祖還厨中生氏復為寇掠昶又遣儀司劉崇義字文琦入厨中討之於是羣氏並平及王謙舉兵沙氏帥開府

楊永安又據州應謙大將軍達奚儒討平之

吐谷渾本遼東鮮卑徙河涉歸子也涉歸一名奕洛韓
有二子庶長曰吐谷渾少曰若洛廆涉歸死若洛廆代
統部落是為慕容氏涉歸之存也分戶七百以給吐谷
渾與若洛廆二部馬鬪相傷若洛廆怒遣人謂吐谷渾
曰先公處分與兄異部何不相遠而馬鬪相傷吐谷渾
曰馬食草飲水春氣發動所以鬪鬪在馬而怒及人乖
別甚易今當去汝萬里外若洛廆悔遣舊老及長史七

那樓謝之吐谷渾曰我乃祖以來樹德遼右先公之世
卜筮之言云有二子當享福祚並流子孫我是卑庶理
無並大今以馬致怒殆天所啓諸君試驅馬令東馬若
還東我當隨去即令從騎擁馬令迴數百步歎然悲鳴
突走而西聲若頽山如是者十餘輩一迴一迷樓力屈
乃跪曰可汗此非復人事渾謂其部落曰我兄弟子孫
並應昌盛廆當傳子及曾玄孫其間可百餘年我乃玄
孫間始當顯耳於是遂西附陰山後假道上龍若落廆

追思吐谷渾作阿于歌徒河以兄為阿于也子孫僭號
以此歌為輦後鼓吹大曲吐谷渾遂從上隴止於枹罕
自枹罕暨甘松南界昂城龍涸從洮水西南極白蘭數
千里中逐水草廬帳而居以肉酪為糧西北諸部落謂
之阿柴虜吐谷渾死有子六十人長子吐延身長七尺
八寸勇力過人性刻暴為昂城羌酋姜聰所刺効猶在
體呼子葉延語其大將絕拔渥曰吾氣絕棺斂訖便速
去保蘭地既峻遠又土俗懦弱易控禦葉延小兒欲授

餘人恐倉卒終不能相制令以葉延付汝竭股肱之力
以輔之孺子得立吾無恨也抽効而死有子十二人葉
延少而勇果年十歲縛草為人號曰姜聰每旦輒射之
射中則嗥呌啦涕其母曰讎賊諸將已屠膾之汝年小
何煩朝朝自苦葉延嗚咽若不自勝荅母曰誠知無益
然罔極之心不勝其痛性至孝母病母三日不食葉延
亦不食頗視書傳自謂曾祖奕洛韓始封昌黎公吾為
公孫之子案禮公孫之子得以王父字為氏遂以吐谷

渾為氏焉葉延死子碎奚立性淳謹三弟專權碎奚不能制諸大將共誅之奚憂哀不復攝事遂立子視連為世子委之事號曰莫賀郎華言父也奚遂以憂死視連立以父憂思不遊娛酣宴十五年死弟視罷立死子樹洛干等並幼弟烏紇提立而妻樹洛干母生二子慕瓊利延烏紇提一名大孩死樹洛干立自號車騎將軍是歲晉義熙初也樹洛干死弟阿豺立自號驃騎將軍沙州刺史部內有黃沙周廻數百里不生草木因號沙州

阿豺兼井氏羌地方數千里號為強國昇西強山觀墊江源問於羣寮曰此水東流更有何名由何郡國入何水也其長史曾和曰此水經仇池過晉壽出宕渠始號墊江至巴郡入江度廣陵入於海阿豺曰水尚知歸吾雖塞表小國而獨無所歸乎遣使通宋獻其方物宋少帝封為澆河公未及拜受宋文帝元嘉三年又加除命又將遣使朝貢會暴病臨死召諸子弟告之曰先公車騎捨其子虔以大業屬吾豈敢忘先公之舉而私於緯

代其以慕瓊繼事阿豺有子二十人緯代長子也阿豺又謂曰汝等各奉吾一隻箭將玩之地下俄而命母弟慕利延曰汝取一隻箭折之慕利延折之曰汝取十九隻箭折之慕延不能折阿豺曰汝曹知不單者易折衆則難摧戮力一心然後社稷可固言終而死慕瓊立先是阿豺時宋命竟未至而死慕瓊又奉表通宋宋文帝又授隴西公慕瓊招集秦涼亡業之人及羌戎雜夷衆至五六百落南通蜀漢北交涼州赫連部衆轉盛太武

時慕瓊始遣其侍郎謝大寧奉表歸魏尋討禽赫連定
送之京師太武嘉之遣使者策拜慕瓊為大將軍西秦
王慕瓊表曰臣誠庸弱敢竭精款俘禽僭逆獻捷王府
爵秩雖崇而土不增廓車旗既飾而財不周賞願垂鑒
察亮其單款臣須接寇逆彊境之人為賊所抄流轉東
下今皇化混一求還鄉土乞佛曰連窟略寒張華等三
人家弱在此分垂可愍願并敕遣使恩洽遐荒存亡感
戴太武詔公卿朝堂會議答施行太尉長孫嵩及議郎

博士二百七十九人議曰前者有司所處以為秦王荒外之君本非政教所及來則受之去則不禁皇威遠被西秦王慕義畏威稱臣納貢求受爵號議者以為古者要荒之君雖人土衆廣而爵不擬華夏陛下加寵王官乃越常分容飾車旗班同上國至於繒絮多少舊典所無皆當臨時以制豐寡自漢魏以來撫綏遐荒頗有故事呂后遺單于御車二乘馬二駟單于答馬千匹其後匈奴和親敵國遺繒絮不過數百呼韓邪稱臣身自入

朝始乃至萬匹今西秦王若以土無桑蠶便當上請不得言財不周賞也周室衰微齊侯小白一匡天下有賜胙之命無益土之賞晉侯重耳破楚城濮唯受南陽之田為朝宿之邑西秦所致唯定而已塞外之人因時乘便侵入秦涼未有經略拓境之勲爵登上國統秦涼河沙四州之地而云土不增廓比聖朝於弱周而自同於五霸無厯之情其可極乎西秦王忠款於朝廷原其本情必不至此或左右不敕以致斯累檢西秦流人賊時

所抄悉在薄坂今既稱藩四海咸泰天下一家可敕秦州送詣京師隨後遣還所請乞佛三人昔為賓國之使來在王庭國破家遷即為臣妾可勿聽許制曰公卿議之未為失體西秦王所收金城枹罕隴西之地彼自取之朕即與之便是裂土何須復廓西秦款至絲絹隨使疎數增益之非一匹而已自是慕瓊貢獻頗簡又通於宋宋文封為隴西王太延二年慕瓊死弟慕利延立詔遣使者策謚慕瓊曰惠王後拜慕利延鎮西大將軍儀

同三司改封西平王以慕瓊子元緒為撫軍將軍時慕利延又通宋宋封為河南王太武征涼州慕利延懼遂率其部人西遁沙漠太武以慕利延兄有禽赫連定之功遣使宣喻之乃還後慕利延遣使表謝書奏乃下詔褒獎之慕利延兄子綿代懼慕利延害已與使者謀欲自歸慕利延覺而殺之緯代弟叱力延等八人逃歸京師請兵討慕利延太武拜叱力延歸義王詔晉王伏羅率諸將討之軍至大母橋慕利延兄子拾寅走河西伏

羅遣將追擊之斬首五十餘級慕利延走白蘭慕利延從弟伏念長史鴉鳩黎部大崇娥等率衆一萬三千落歸降後復遣征西將軍高梁王那等討之於白蘭慕利延遂入于闐國殺其王死者數萬人南征劉賓遣使通宋求援獻烏丸帽女國金酒器胡王金釧等物宋文帝賜以牽車七年遂還舊土慕利延死樹洛干子拾寅立始邑於伏羅川其居止出入竊擬王者拾寅奉修貢職受魏正朔又受宋封爵號河南王太武遣使拜為鎮西

大將軍沙州刺史西平王後拾寅自恃嶮遠頗不恭命
通使于宋獻善馬四角羊宋明帝加之官號文成時定
陽侯曹安表拾寅令保自蘭多有金銀牛馬若擊之可
以大獲議者咸以先帝忿拾寅兄弟不睦使晉王伏羅
高涼王郁再征之竟無多剋拾寅雖復遠遁軍亦疲勞
今在白蘭不犯王塞不為人患非國家之所急也若遣
使招慰必求為臣妾可不勞而定也王者之於四荒羈
縻而已何必屠其國有其地安曰臣昔為澆河戍將與

之相近明其意勢若分軍出其左右拾寅必走保南山
不過十月牛馬草盡人無所食衆必潰叛可一舉而定
也從之詔陽平王新成建安王穆六頭等出南道南郡
公李惠給事中公孫拔及安出北道以討之拾寅走南
山諸軍濟河追之時軍多病諸將議賊已遠遁軍容已
振令驅疲病之卒要難冀之功不亦過乎衆以為然乃
引還獲駝馬二十餘萬獻文復詔上黨王長孫觀等率
州郡兵討拾寅軍至曼頭山拾寅來逆戰觀等縱兵擊

敗之拾寅宵遁於是思悔復蕃職遣別駕康盤龍奉表
朝貢獻文幽之不報其使拾寅部落大饑屢寇澆河詔
平西將軍廣川公皮歡喜率燉煌州枹罕高平將軍為
前鋒司空上黨王長孫觀為大都督以討觀等軍入拾
寅境芻其秋稼拾寅窘怖遣子詣軍表求改過觀等以
聞獻文以重勞將士乃下詔切責之徵其任子拾寅遣
子斤入侍獻文尋遣斤還拾寅後復擾掠邊人遣其將
良利守洮陽枹罕所統也枹罕鎮將西郡公楊鍾葵貽

拾寅書以責之拾寅表曰奉詔聽臣還舊土故遣良利
守洮陽若不追前恩求令洮陽貢其土物辭旨懇切獻
文許之自是歲修職貢太和五年拾寅死子度易侯立
遺其侍郎時真貢方物提上表稱嗣事後度易侯伐宕
昌詔讓之賜錦綵一百二十匹喻令悛改所掠宕昌口
累部送時還易侯並奉詔死子伏連籌立孝文欲令入
朝表稱疾病輒修洮陽渥和城而置戍焉文明太后崩
使人告凶伏連籌拜命不恭有司請伐之孝文不許羣

臣以其受詔不敬不宜納所獻帝曰拜受失禮乃可加
以詰責所獻土毛乃是臣之常道杜棄所獻便是絕之
縱欲改悔其路無由矣詔曰朕在哀疚之中未存征討
而去春袍罕表取其洮陽渥和二戍時此既邊將之常
即便聽許及偏師致討二戍望風請降執訊二千餘人
又得婦女九百口子婦可悉還之伏連乃遣世子賀魯
頭朝于京師禮錫有加拜伏連籌使持節都督西垂諸
軍事征西將軍領護西戎中郎將西海郡開國公吐谷

渾王麾旗章授之飾皆備給之後遣兼員外散騎常侍
張禮使於伏連籌謂禮曰昔與宕昌通和恒見稱大王
已自有名今忽名僕而拘執此使將命偏師往問其意
禮曰君與宕昌並為魏蕃而比輒有興動殊違臣節當
發之日宰輔以為君若返迷知罪則克保蕃業脫守愚
不改則禍難將至伏連籌遂嘿然及孝文崩遣使赴哀
盡其誠敬伏連籌內修職貢外并戎狄塞表之中號為
強富准擬天朝樹置官司稱制諸國以自誇大宣武初

詔責之曰梁州表送卿報宕昌梁彌邕與卿並為邊附語其國則隣藩論其位則同列而稱書為表名報為旨有司以國常刑殷勤請討朕慮險遠多虞輕相構惑故先宣此意善自三思伏連籌上表自申辭誠懇至終宣武世至於正光舜牛蜀馬及西南之珍無歲不至後秦州城人莫折念生反河西路絕涼州城人萬千菩提等東應念生囚刺史宋穎穎密遣求援於伏連籌伏連籌親率大衆救之遂獲保全自爾以後關徼不通貢獻遂

絕伏連籌死子夸呂立始自號為可汗居伏俟城在青海西十五里雖有城郭而不居恒處穹廬隨水草畜牧其地東西三千里南北千餘里官有王公僕射尚書及郎中將軍之號夸呂椎髻珥珠以皂為帽坐金獅子牀號其妻為母尊衣織成裙披錦大袍辮髮於後首戴金花冠其俗大丈夫衣服畧同於華夏多以羅幕為冠亦以繒為帽婦人皆貫珠貝束髮以多為貴兵器有弓刀甲硝國無常賦湏則稅富室商人以充用焉其刑罰殺

人及盜馬死餘則徵物以贖罪亦量事決杖刑人必以
氈蒙頭持石從高擊之父兄死妻後母及嫂等與突厥
俗同至於婚貧不能備財者輒盜女去死者亦皆埋殯
其服制葬訖則除之性貪婪忍於殺害好射獵以肉酪
為糧亦有種田有大麥粟豆然其北界氣候多寒唯得
蕪菁大麥故其俗貧多富少青海周回千餘里海內有
小山每冬冰合後以良牝馬置此山至來春收之馬皆
有孕所生得駒號為龍種必多駿異吐谷渾嘗得波斯

草馬放入海因生驄駒能日行千里世傳青海驄者也
土出犧牛馬驃多鸚鵡饒銅鐵朱砂地兼善且末興
和中齊神武作相招懷荒遠蠕蠕既附於國夸呂遣使
致敬神武喻以大義徵其朝貢夸呂乃遣使人趙吐骨
真假道蠕蠕頻來東魏又薦其從妹靜帝納以為嬪遣
員外散騎常侍傅靈櫬使於其國夸呂又請婚乃以濟
南王匡孫女為廣樂公主以妻之此後朝貢不絕及西
魏大統初周文遣儀同潘濬喻以逆順之理於是夸呂

再遣使獻能舞馬及羊牛等然寇抄不已緣邊多被其
害廢帝二年周文勒大兵至姑臧夸呂震懼使貢方物
是歲夸呂又通使於齊涼州刺史寧覘知其還襲之
於州西赤泉獲其僕射乞伏觸狀將軍翟潘密商胡二
百四十人駝驃六百頭雜綵絲絹以萬計恭帝三年史
寧又與突厥木杆可汗襲擊夸呂破之虜其妻子獲珍
物及雜畜武成初夸呂復寇涼州刺史是云寶戰沒賀
蘭祥字文貴率兵討之夸呂遣其廣定王鍾留王拒戰

祥等破之廣定等遁走又拔其洮陽洪和二城置洮州而還保定中夸呂前後三輩遣使獻方物天和初其龍涸王莫昌率來降以其地為扶州二年五月復遣使來獻建德五年其國大亂武帝詔皇太子征之軍至伏俟城夸呂遁走虜其餘眾而還明年又再遣使奉獻宣政初其趙王他婁屯來降自是朝獻遂絕及隋開皇初侵弘州地曠人梗廢之遣上柱國元詣率步騎數萬擊之賊悉發國中自曼頭至樹敦甲騎不絕其所署河西總

管定城王鍾利房及其太子可博汗前後來拒戰詣頻
破之夸呂大懼率親兵遠遁其名王十三人召率部落
而降上以其高寧王移茲東素得衆心拜大將軍封河
南王以統降衆自餘官賞各有差未幾復來寇邊州刺
史皮子信拒戰死之汝州總管梁遠以銳卒擊之乃奔
退俄而入寇廓州州兵擊走之夸呂在位百年屢因喜
怒廢殺太子其後太子懼殺遂謀執夸呂而降請兵於
邊吏秦州總管河間王計應之上不許太子謀泄為其

父所殺復立少子嵬王訶為太子豐州刺史杜祭請因
其釁討之上又不許六年嵬王訶復懼父誅謀歸國請
兵迎接上謂其使者曰溥天之下皆是朕臣妾各為善
事即朕稱心嵬王既有好意欲來投服唯教嵬王為臣
子法不可遠遣兵馬助為惡事嵬王乃止八年其名王
拓拔木彌請以千餘家歸化上曰叛天背父何可收納
又其本意正自避死若今逼拒又復不仁若有音信宜
遣慰撫任其自投不湏出兵馬應接其妹夫及甥欲來

亦任其意不勞勸誘也是歲河南王移茲喪死文帝令
其弟樹歸襲統其衆平陳之後夸呂大懼逃遁險遠不
敢為寇十一年夸呂卒子世伏使其兄子無素奉表稱
藩并獻方物請以女備後庭上謂無素曰若依來請他
國便當相學一許一塞是謂不平若並許之又非好法
竟不許十一年遣刑部尚書宇文弼撫慰之十六年以
光化公主妻世伏上表稱公主為天后上不許明年其
國大亂國人殺世伏立其弟伏允為主使陳廢立事并

謝專命罪且請依俗尚主上從之自是朝貢歲至而常
訪國家消息上甚惡之煬帝即位伏允遣子順來朝時
鐵勒犯塞帝遣將軍馮孝慈出燉煌禦之戰不利鐵勒
遣使謝罪請降帝遣黃門侍郎裴矩撫慰之諷令擊吐
谷渾以自效鐵勒即勒兵襲破吐谷渾伏允東走保西
平境帝復令觀德王雄出澆河許公宇文述出西平掩
之大破其衆伏允遁逃於山谷間其故地皆空自西平
臨羌城以西且末以東祁連以南雪山以北東西四千

里南北二千里皆為隋有置郡縣鎮戍發天下輕罪徙居之於是留順不之遣伏允無以自資率其徒數千騎客於党項帝立順為主送出玉門令統餘衆以其大寶王泥洛周為輔至西平其部下殺洛周順不果入而還大業末天下亂伏允復其故地屢寇河右郡縣不能制吐谷渾北有乙弗勿敵國國有屈海海周迴千餘里衆有萬落風俗與吐谷渾同然不識五穀唯食魚及蘇子蘇子狀若中國枸杞子或赤或黑有契翰一部風俗亦

同特多狼白蘭山西北又有可蘭國風俗亦同目不識五色耳不聞五聲是夷蠻戎狄之中醜類也土無所出直大養羣畜而戶落亦可萬餘人頑弱不知鬪戰忽見異人舉國便走性如野獸體輕工走逐不可得白蘭西南二千五百里隔大嶺又度四十里海有女王國人庶萬餘落風俗土著宜桑麻熟五穀以女為王故因號焉譯使不至其傳云然

宕昌羌者其先蓋三苗之裔周時與庸蜀微盧等八國

從武王滅商漢有先零燒當等世為邊患其地東接中
華西通西域南北數千里姓別自為部落首帥皆有地
分不相統攝宕昌即其一也俗皆土著居有屋宇其屋
織犧牛尾及羖羊毛覆之國無法令又無徭賦唯戰伐
之時乃相屯聚不然則各事生業不相往來皆衣裘褐
牧養犧牛羊豕以供其食父子伯叔兄弟死者即以繼
母世叔母及嫂弟婦等為妻俗無文字但候草木榮落
記其歲時三年一相聚殺牛羊以祭天有梁慙者世為

酋帥得羌豪心乃自稱王焉憇孫彌忽太武初遣子彌
黃奉表求內附太武嘉之遣使拜彌忽為宕昌王賜彌
黃爵甘松侯彌忽死孫彪子立其地自仇池以西東西
千里酈水以南南北八百里地多山阜人二萬餘落世
修職貢頗為吐谷渾所斷絕彪子死彌治立彪子弟羊
子先奔吐谷渾遣兵送羊子欲奪彌治位彌治遣使請
救獻文詔武都鎮將宇文生救之羊子退走彌治死子
彌機立遣其司馬利柱奉表貢方物楊文度之叛圍武

都彌機遣其二兄率衆救武都破走文度孝文時遣使
子橋表貢朱砂雌黃白石膽各一百斤自此後歲以為
常朝貢相繼後孝文遣鴻臚劉歸謁者張察拜彌機征
南大將軍西戎校尉梁益二州牧河南公宕昌王以助
之周文命章武公遵率兵送之

鄧至者白水羌也世為羌豪因地名號自稱鄧至其地
自亭街以東平武以西汶嶺以北宕昌以南土風習俗
亦與宕昌同其王像舒治遣使內附高祖拜龍驤將軍

鄧至王遣貢不絕鄧至之西有赫羊國初其部內有一
羊形甚大色至鮮赤故因為國名又有東亭衛大赤水
寒宕石河薄陵下習山倉驥覃水等諸羌國風俗麤犷
與鄧至國不同焉亦時遣貢使朝廷納之皆假之以雜
號將軍子男渠帥之名

白蘭者羌之別種也其地東北接吐谷渾西北利模徒
南界鄯鄂風俗物產與宕昌畧同周保定元年遣使獻

犀甲鐵鎧

党項羌者三苗之後也其種有宕昌白狼皆自稱獮猴
種東接臨洮西平西拒葉護南北數千里處山谷間每
姓別為部落大者五千餘騎小者千餘騎織犢牛尾及
黏麁毛為屋服裘褐披氈為上飾俗尚武力無法令各
為生業有戰陣則屯聚無徭役不相往來養犢牛羊猪
以供食不知稼穡其俗淫穢蒸報於諸夷中為甚無文
字但候草木以記歲時三年一聚會殺牛羊以祭天人
年八十以上死者以為令終親戚不哭少死者則云天

枉共悲哭之有琵琶橫吹擊缶為節魏周之際數來擾
邊隋文帝為丞相時中原多故因此大為寇掠蔣公梁
睿既平王謙請因還師討之開皇元年有千餘家歸化
五年拓拔寧叢等各率衆詣旭州內附授大將軍其部
下各有等差十六年復寇會州詔發隴西兵討之大破
其衆人相率降遣子弟入謝罪帝謂曰還語爾父兄人
生湏有定居養老長幼乃乍還乍走不羞鄉里邪自是
朝貢不絕

附國者蜀郡西北二千餘里即漢之西南夷也有嘉良
夷即其部所居種姓自相率領土俗與附國同言語少
殊不統一其人並無姓氏附國王字宜繒其國南北八
百里東西千五百里無城柵近川谷傍山險俗好復讎
故壘石為礫以避其患其礫高至十餘丈下至五六丈
每級以木隔之基方三四步礫上方二三步狀似浮圖
於下致級開小門從內上通夜必關閉以防賊盜國有
重罪者罰牛人皆輕捷便擊劙漆皮為牟甲弓長六尺

竹為箭妻其羣母及嫂兒弟父兄亦納其妻好歌舞鼓
簧吹長角有死者無服制置屍高牀之上沐浴衣服以
牛甲覆以獸皮子孫不哭帶甲舞効而呼云我父為鬼
所取我欲報冤殺鬼自餘親戚哭三聲而止婦人哭必
兩手掩面死家殺牛親屬以猪酒相遺共飲啜而瘞之
死後一年方始大葬必集親賓殺馬動至數十匹立木
為祖父神而事之其俗以皮為帽形圓如鉢或帶冕籠
衣多毛皮裘全剥牛腳皮為靴項繫鐵鎧手貫鐵釧王

與酋帥金為首飾胷前縣一金花徑三寸其土高氣候
涼多風少雨宜小麥青裸山出金銀銅多白雉水有嘉
魚長四尺而鱗細大業四年其王遣使素福等八人入
朝明年又遣其弟子宜林率嘉良夷六十人朝貢欲獻
良馬以路險不通請開山道修職貢物煬帝以勞人不
許嘉良有水濶六七十丈附國有水濶百餘丈並南流
用皮為舟而濟附國有薄緣夷風俗亦同西有女國其
東北連山綿亘數千里接於突厥往往有羌大小左封

昔衛葛延白狗向人望族林臺春桑利豆迷桑婢藥大
狹白蘭北利摸徒那鄂當迷渠步桑悟千碉並在深山
窮谷無大君長其風俗畧同於党項或後屬吐谷渾或
附國大業中朝貢緣西南邊置諸道總管以管之

稽胡一曰步落稽蓋匈奴別種劉元海五部之苗裔也
或云山戎赤狄之後自離石以西安定以東方七八百
里居山谷間種類繁熾其俗土著亦知種田地少桑蠶
多衣麻布其丈夫衣服及死亡殯葬與中夏畧同婦人

則多貫蜃貝以為耳頸飾與華人錯居其渠帥頗識文
字言語類夷狄因譯乃通蹲踞無禮貪而忍害俗好淫
穢女尤甚將嫁之夕方與淫者叙離夫氏聞之以多為
貴既嫁頗亦防閑有犯姦者隨事懲罰又兄弟死者皆
納其妻雖分統郡縣列於編戶然輕其徭賦有異華人
山谷阻深者又未盡役屬而兇悍恃險數為寇魏孝昌
中有劉蠡升者居雲陽谷自稱天子立年號署百官屬
魏氏亂力不能討蠡升遂分遣部衆抄掠汾晉之間畧

無寧歲神武遷鄴後始密圖之乃偽許以女妻蠡升太子蠡升遂遣子詣鄴齊神武厚禮之緩以婚期蠡升既特和親不為之備魏大統元年三月齊神武襲之蠡升率輕騎出外徵兵為其北部王所殺送於神武其衆復立蠡升第三子南海王為主神武滅之獲其偽主及弟西海王并王后夫人王公以下四百餘人歸於鄴居河西者多恃險不賓時周文方與神武爭衡未遑經畧乃遣黃門侍郎楊檉就安撫之五年黑水部衆先叛七年

別帥夏州刺史劉平伏又據上郡反自是北山諸部連
歲寇暴周文前後遣于謹侯莫陳崇李弼等相繼討平
之武成初延州稽胡赫阿保狼皮率其種人附於齊氏
阿保自置丞相狼皮自署柱國并與其別部劉柔德共
為影響柱國豆盧寧督諸軍擊破之二年狼皮等餘黨
復叛詔大將軍韓果討破之保定中離石生胡數寇汾
北敷州刺史韋孝寬於險要築城置兵糧以遏其路及
楊忠與突厥伐齊稽胡等便懷旅拒不供糧餉忠乃詐

其酋帥云與突厥迴兵討之酋帥等懼乃相率供饋焉
其後丹州綏州等部內諸胡與蒲州別帥郝協郎等又
頻年逆命復詔達奚震辛威于寔等前後窮討散其種
落天和二年延州總管宇文盛率衆城銀州稽胡白郁
久同喬是羅等欲邀襲盛並討斬之又破其別帥為喬
三勿同等五年開府劉雄出綏州巡檢北邊川路稽胡
帥白郎喬素勿同等度河逆戰雄復破之建德五年武
帝敗齊師於晉州乘勝逐北齊人所棄甲仗未暇收歛

稽胡乘間竊出並盜而有之乃立蠡升孫沒鐸為主號
聖武皇帝年曰石平六年武帝定東夏將討之議欲窮
其巢穴齊王憲以為種類既多又山谷阻絕王師一舉
未可盡除且當翦其魁帥餘加慰撫帝然之乃以憲為
行軍元帥督行軍總管趙王招譙王儉滕王逌等討之
憲軍次馬邑乃分道俱進沒鐸遣其黨天柱守河東又
遣其大帥穆支據河西規欲分守險要掎角憲軍憲命
譙王儉擊破之斬獲千餘級趙王招又禽沒鐸眾盡降

宣政元年汾胡帥劉受羅干覆爪越王盛督諸軍討禽之自是寇盜頗息

論曰氐羌吐谷渾等曰殊俗別處邊陲考之前代屢經叛服窺覬首鼠蓋其本性夫無德則叛有道則服先王所述荒服也

北史卷九十六考證

氏傳氏者西夷之別種○西監本訛四今改從魏書

流人有許穆之郝惔之二人投難當並改姓司馬○監

本惔之下缺二字改姓下衍為字今俱從南本改正

尋而思詰使其司馬蕭道成先驅進討所向冠捷○道

成魏書作承之

臣人龍

按魏書承之乃道成父島夷

傳稱承之常隨宗人思詰征伐久乃得為其橫野司

馬則此當以承之為是雖道成亦嘗前後為征蠻小

帥而思話鎮襄陽時祇任以統戍稍遷參軍恐此稱司馬之非道成也今各本俱同姑仍之

送租於南秦東益○租監本訛祖今據魏書及本書張普惠傳改正

吐谷渾傳若洛廆追思吐谷渾作阿于歌○于魏書作于干

便速去保蘭○蘭字上魏書有白字

亦有種田○有魏書作知

其名王十三人召率部落而降○召陳書作各
秦州總管河間王計應之○計應之隋書作弘請將兵
應之

任其自投○投隋書作拔

帝復令觀德王雄出澆河○隋書無德字

党項羌傳織犧牛尾及羖羈毛為屋○羖隋書作羖

附國傳狀似浮圖於下致級開小門○隋書無致字

稽胡傳滕王迥等○迥疑係廸字之訛

北史卷九十六考證

謹案卷九十五第十九頁後一行唯送女人女此
句疑有脫字

卷九十六第二十五頁後八行與庸蜀微盧等八
國刊本盧訛盧今改





覆校官編修臣劉種之
校對官檢討臣王鍾健
謄錄監生臣孫起鵬

欽定四庫全書叢書要

史部

北史卷九十七



詳校官內閣侍讀臣孫
球

欽定四庫全書
薈要卷四十九百八

史部

北史卷九十七

唐

李

延

壽

撰

列傳第八十五

西域

夏書稱西戎即序班固云就而序之非盛威武致其貢物也漢世初開西域有三十六國其後分立五十五王置校尉都護以撫之王莽篡位西域遂絕至於後漢班

超所通者五十餘國西至西海東西萬里皆來朝貢復置都護校尉以相統攝其後或絕或通漢朝以為勞獎中國其官時置時廢暨魏晉之後互相吞滅不可復詳記焉道武初經營中原未暇及於四表既而西戎之貢不至有司奏依漢氏故事請通西域可以振威德於荒外又可致奇貨於天府帝曰漢氏不保境安人乃遠開西域使海內虛耗何利之有今若通之前弊復加百姓矣遂不從歷明元世竟不招納太延中魏德益以遠聞

西域龜茲疏勒烏孫悅般渴槃陁善焉耆車師粟特
諸國王始遣使來獻太武以西域漢世雖通有求則卑
辭而來無欲則驕慢王命此其自知絕遠大兵不可至
故也若報使往來終無所益欲不遣使有司奏九國不
憚遐嶮遠貢方物當與其進安可豫抑後來乃從之於
是始遣行人王恩生許綱等西使恩生出流沙為蠕蠕
所執竟不果達又遣散騎侍郎董琬高明等多齋錦帛
出鄯善招撫九國厚賜之初琬等受詔便道之國可往

赴之琬過九國北行至烏孫國其王得魏賜拜受甚悅謂琬等曰傳聞破洛那者舌皆思魏德欲稱臣致貢但患其路無由耳今使君等既到此可往二國副其慕仰之誠琬於是自向破洛那遣使者烏孫王為發導譯達二國琬等宣詔慰賜之已而琬明東還烏孫破洛那之屬遣使與琬俱來貢獻者十有六國自後相繼而來不間於歲國使亦數十輩矣初太武每遣使西域常詔河西王沮渠牧犍令護送至姑臧牧犍恒發使道路出於

流沙後使者自西域還至武威牧犍左右謂使者曰我
君承蠕蠕吳提妄說云去歲魏天子自來伐我士馬疲
死大敗而還我擒其長弟樂平王丕我君大喜宣言國
中又聞吳提遣使告西域諸國魏已削弱今天下惟我
為強若更有魏使勿復恭奉西域諸國亦有貳且牧犍
事主稍以慢隨使還具以狀聞太武遂議討牧犍涼州
既平鄯善國以為唇亡齒寒自然之道也今武威為魏
所滅次及我矣若通其使人知我國事取亡必近不如

絕之可以支久乃斷塞行路西域貢獻歷年不入後平
鄯善行人復通始琬等使還京師具言凡所經見及傳
聞傍國云西域自漢武時五十餘國後稍相并至太延
中為十六國分其地為四域自葱嶺以東流沙以西為
一域葱嶺以西海曲以東為一域者舌以南月氏以北
為一域兩海之間水澤以南為一域內諸小渠長葢以
百數其出西域本有二道後更為四出自玉門度流沙
西行二千里至鄯善為一道自玉門度流沙北行二千

二百里至車師為一道從莎車西行一百里至葱嶺葱
嶺西一千三百里至伽倍為一道自莎車西南五百里
葱嶺西南一千三百里至波路為一道焉自琬所不傳
而更有朝貢者紀其名不能具國俗也東西魏時中國
方擾及於齊周不聞有事西域故二代書並不立紀錄
隋開皇仁壽之間尚未云經略煬帝時乃遣侍御史常
節司隸從事杜行滿使於西藩諸國至罽賓得瑪瑙盆
王舍城得佛經史國得十舞女師子皮火鼠毛而還帝

復令聞嘉公裴矩於武威張掖間往來以引致之其有
君長者四十四國矩因其使者入朝啗以厚利令其轉
相諷諭大業中相率而來朝者四十餘國帝因置西戎
校尉以應接之尋屬中國大亂朝貢遂絕然事亡失書
所存錄者二十國焉魏時所來者在隋亦有不至今總
而編次以備前書之西域傳云至於道路遠近物產風
俗詳諸前史或有不同斯皆錄其當時蓋以備其遺闕

爾

鄯善國都扞泥城古樓蘭國也去代七千六百里所都
城方一里地多沙鹵少水草北即白龍堆路至太延初
始遣其弟素延者入侍及太武平涼州沮渠牧犍弟無
諱走保燉煌無諱後謀渡流沙遣其弟安周擊鄯善王
比龍恐懼欲降會魏使者自天竺罽賓還俱會鄯善勸
比龍拒之遂與連戰安周不能尅退保東城後比龍懼
率衆西奔且末其世子乃應安周鄯善人頗剽劫之令
不得通太武詔散騎常侍成周公萬度歸乘傳發涼州

兵討之度歸到燉煌留輜重以輕騎五千渡流沙至其境時鄯善人衆布野度歸勅吏卒不得有所侵掠邊守感之皆望旗稽服其王真達面縛出降度歸釋其縛留軍屯守與真達詣京都太武大悅厚待之是歲拜交趾公韓杖為假節征西將軍領護西戎校尉鄯善王以鎮之賦役其人比之郡縣

且末國都且末城在鄯善西去代八千三百二十里真君三年鄯善王比龍避沮渠安周之難率國人之半奔

且末後役屬鄯善且末西北有流沙數百里夏日有熱風為行旅之患風之所至惟老駝預知之即嗔而聚立埋其口鼻於沙中人每以為候亦即將氈擁蔽鼻口其風迅駛斯湏過盡若不防者必至危斃大統八年其兄鄯善米率衆內附

于闐國在且末西北葱嶺之北二百餘里東去鄯善千五百里南去女國三千里去朱俱波千里北去龜茲千四百里去代九千八百里其地方亘千里連山相次所

都城方八九里部內有大城五小城數十于闐城東三十里有首拔河中出玉石土宜五穀并桑麻山多美玉有好馬駝驃其刑法殺人者死餘罪各隨輕重懲罰之外風俗物產與龜茲略同俗重佛法寺塔僧尼甚衆王尤信尚每設齋日必親自灑掃饋食焉城南五十里有贊摩寺即昔羅漢比丘盧旃為其王造覆盆浮圖之所石上有辟支佛跣處雙跡猶存于闐西五百里有比摩寺云是老子化胡成佛之所俗無禮義多盜賊淫縱

自高昌以西諸國人等深目高鼻惟此一國貌不甚胡
頗類華夏城東二十里有大水北流號樹枝水即黃河
也一名計式水城西十五里亦有大水名達利水與樹
枝水會俱北流真君中太武詔高涼王鄯擊吐谷渾慕
利延慕利延懼驅其部落渡流沙船進軍急追之慕利
延遂西入于闐殺其王死者甚衆獻文末蠕蠕寇于闐
于闐患之遣使素目伽上表曰西方諸國今皆已屬蠕
蠕奴世奉大國至今無異今蠕蠕軍馬至城下奴聚兵

自固故遣使奉獻遙望救援帝詔公卿議之公卿奏曰于闐去京師幾萬里蠕蠕之性惟習野掠不能攻城若為害當時已旋矣雖欲遣師勢無所及帝以公卿議示其使者亦以為然於是詔之曰朕承天理物欲令萬方各安其所應勅諸軍以拯汝難但去汝遐阻政復遣援不救當時之急是以停師不行汝宜知之朕今練甲養卒一二歲間當躬率猛將為汝除患汝其謹警候以待大舉先是朝廷遣使者韓羊皮使波斯波斯王遣使獻

馴象及珍物經于闐于闐中于王秋仁輒畱之假言慮
有寇不達羊皮言狀帝怒又遣羊皮奉詔責讓之自後
每使朝貢周建德三年其王遣使獻名馬隋大業中頻
使朝貢其王姓王字早示門練錦帽金鼠冠妻戴金花
其王髮不令人見俗言若見王髮其年必儉云

蒲山國故皮山國也居皮城在于闐南去代一萬二十
里其國西南三里有凍凌山後役属于闐

悉居半國故西夜國也一名子合其王號子治呼犍在

于闐西去代萬二千九百七十里太延初遣使來獻自後貢使不絕

權於摩國故烏秅國也其王居烏秅城在悉居半西南去代一萬二千九百七十里

渠莎國居故莎車城在子合西北去代一萬二千九百八十里

車師國一名前部其王居交河城去代萬五十里其地北接蠕蠕本通使交易太武初始遣使朝獻詔行人王

恩生許綱等出使恩生等始度流沙為蠕蠕所執恩生見蠕蠕吳提持魏節不為之屈後太武切讓吳提吳提懼乃遣恩生等歸許綱到燉煌病死朝廷壯其節賜謚曰貞初沮渠無諱兄弟之渡流沙也鳩集遺人破車師國真君十一年車師王車夷落遣使琢進薛直上書曰臣亡父僻處塞外仰慕天子威德遣使奉獻不空於歲天子降念賜遺甚厚及臣繼立亦不闕常貢天子垂矜亦不異前世敢緣至恩輒陳私懇臣國自無諱所攻擊

經今八歲人民飢荒無以存活賊今攻臣甚急臣不能自全遂捨國東奔三分免一即日已到焉耆東界思歸天闕幸垂賑救於是下詔撫慰之開焉耆倉給之正平初遣子入侍自後每使朝貢不絕

高昌者車師前王之故地漢之前部地也東西二百里南北五百里四面多大山或云昔漢武遣兵西討師旅頓弊其中尤困者因住焉地勢高敞人庶昌盛因名高昌亦云其地有漢時高昌壘故以為國號東去長安四

千九百里漢西域長史及戊己校尉並居於此晉以其
地為高昌郡張軌呂光沮渠蒙遜據河西皆置太守以
統之去燉煌十三日行國有八城皆有華人地多石磧
氣候溫暖厥土良沃穀麥一歲再熟宜蠶多五果人饒
漆有草名牽刺其上生蜜而味甚佳引水溉田出赤鹽
其味甚美復有白鹽其形如玉高昌人取以為枕貢之
中國多蒲桃酒俗事天神兼信佛法國中羊馬牧在隱
僻處以避寇非貴人不知其處北有赤石山七十里有

貪汗山夏有積雪此山北鐵勒界也太武時有闐與者
自為高昌太守太延中遣散騎侍郎王恩生等使高昌
為蠕蠕所執真君中與為沮渠無諱所襲奪據之無諱
死弟安周代立和平元年為蠕蠕所并蠕蠕以閻伯周
為高昌王其稱王自此始也太和初伯周死子義成立
歲餘為從兄首歸所殺自立為高昌王五年高車王可
至羅殺首歸兄弟以燉煌人張孟明為王後為國人所
殺立馬儒為王以鞏顧禮麴嘉為左右長史二十一年

遣司馬王體玄奏表朝貢請師逆接求舉國內徙孝文
納之遣明威將軍韓安保率騎千餘赴之割伊吾五百
里以儒居之至羊榛水儒遣嘉禮率步騎一千五百迎
安保去高昌四百里而安保不至禮等還高昌安保亦
還伊吾安保遣使韓興安等十二人使高昌儒復遣顧
禮將其世子義舒迎安保至白棘城去高昌百六十里
而高昌舊人情戀本土不願東遷相與殺儒而立麴嘉
為王嘉字靈鳳金城榆中人既立又臣于蠕蠕那蓋顧

禮與義舒隨安保至洛陽及蠕蠕主伏圖為高車所殺嘉又臣高車初前部胡人悉為高車所徙入於焉耆又為嚙噠所破滅國人分散衆不自立請王於嘉嘉遣第一子為焉耆王以主之熙平元年嘉遣兄子私署左衛將軍田地太守孝亮朝京師仍求內徙乞軍迎援於是遣龍驤將軍孟威發涼州兵三千人迎至伊吾失期而反於後十餘遣使獻珠像白黑貂裘名馬鹽枕等欵誠備至惟賜優旨卒不重迎三年嘉遣使朝貢宣武又遣

孟威使詔勞之延昌中以嘉為持節平西將軍瓜州刺
史泰臨縣開國伯私署王如故熙平初遣使朝獻詔曰
卿地隔閡山境接荒漠頻請朝援徙國內遷雖來誠可
嘉即於理未帖何者彼之毗庶是漢魏遺黎自晉氏不
綱因難播越成家立國世積已久惡徙重遷人懷戀舊
今若動之恐異同之變爰在肘腋不得便如來表也神
龜元年冬孝亮復表求援內徙朝廷不許正光元年明
帝遣假員外將軍趙義等使於嘉嘉朝貢不絕又遣使

奉表自以邊遐不習典誥求借五經諸史并請國子助
教劉燮以為博士明帝許之嘉死贈鎮西將軍涼州刺
史子堅立於後關中賊亂使命遂絕普泰初堅遣使朝
貢除平西將軍瓜州刺史泰臨縣伯王如故又加衛將
軍至永熙中特除儀同三司進為郡公後遂隔絕至大
統十四年詔以其世子玄嘉為王恭帝二年又以其田
地公茂嗣位武成元年其王遣使獻方物保定初又遣
使來貢其國周時城有一十六後至隋時城有十八其

都城周圍一千八百四十步於坐室畫魯哀公問政於
孔子之像官有令尹一人比中夏相國次有公二人皆
王子也一為交河公一為田地公次有左右衛次有八
長史曰吏部祠部庫部倉部主客禮部戶部兵部等長
史也次有五將軍曰建武威遠陵江殿中伏波等將軍
也次有八司馬長史之副也次有侍郎校郎主簿從事
階位相次分掌諸事次有省事專掌道引其大事決之
於王小事則世子及二公隨狀斷決評章錄記事訖即

除籍書之外無久掌文案官人雖有列位並無書惟每
早集於牙門評議衆事諸城各有戶曹水曹田曹城遣
司馬侍郎相監檢校名為令服飾丈夫從胡法婦人裙
襦頭上作髻其風俗政令與華夏略同兵器有弓箭刀
楯甲硝文字亦同華夏兼用胡書有毛詩論語孝經置
學官弟子以相教授雖習讀之而皆為胡語賦稅則計
田輸銀錢無者輸麻布其刑法風俗婚姻喪葬與華夏
小異而大同自燉煌向其國多沙磧茫然無有蹊徑欲

往者尋其人畜骸骨而去路中或聞歌哭聲行人尋之
多致亡失蓋魑魅魍魎也故商客往來多取伊吾路開
皇十年突厥破其四城有二千人來歸中國堅死子伯
雅立其大母本突厥可汗女其父死突厥令依其俗伯
雅不從者久之突厥逼之不得已而從煬帝即位引致
諸蕃大業四年遣使貢獻帝待其使甚厚明年伯雅來
朝因從擊高麗還尚宗室女華容公主八年冬歸蕃下
令國中曰先者以國處邊荒境被髮左衽今大隋統御

宇宙平一孤既沐浴和風庶均大化其庶人以上皆宜
解辯削衽帝聞而善之下詔曰光祿大夫弁國公高昌
王伯雅本自諸華世祚西壤昔因多難翦為胡服自我
皇隋平一宇宙伯雅踰沙忘阻奉貢來庭削衽曳裾變
夷從夏可賜衣冠仍班製造之式然伯雅先臣鐵勒恒
遣重臣在高昌國有商胡往來者則稅之送於鐵勒雖
有此令取悅中華然竟畏鐵勒不敢改也自是歲令貢

方物

且彌國都天山東于大谷在車師北去代一萬五百七十里本役屬車師

焉耆國在車師南都員渠城白山南七十里漢時舊國也去代一萬二百里其王姓龍名鳩尸卑那即前涼張軌所討龍熙之胤所都城方二里國內凡有九城國小人貧無綱紀法令兵有弓刀甲稍婚姻略同華夏死亡者皆焚而後葬其服制滿七日則除之丈夫並翦髮以為首飾文字與婆羅門同俗事天神並崇信佛法也尤

重二月八日四月八日是日也其國咸依釋教齋戒行
道焉氣候寒土田良沃穀有稻粟菽麥畜有駝馬養蠶
不以為絲惟充綿纊俗尚蒲桃酒兼愛音樂南去海十
餘里有魚鹽蒲葦之饒東去高昌九百里西去龜茲九
百里皆沙磧東南去瓜州二千二百里恃地多峻頗剽
劫中國使太武怒之詔成周公萬度歸討之約齋輕糧
取食路次度歸入焉耆東界擊其邊守左廻尉犁二城
拔之進軍圍員渠鳩尸卑鄭以四五萬人出城守險以

距度歸募壯勇短兵直往衝鳩尸卑舠衆大潰盡虜之
單騎走入山中度歸進屠其城四鄙諸戎皆降服焉耆
為國斗絕一隅不亂日久獲其珍奇異翫殊方譎詭難
識之物橐駕馬牛雜畜巨萬時太武幸陰山北宮度歸
破焉耆露板至帝省訖賜司徒崔浩書曰萬度歸以五
千騎經萬餘里拔焉耆三城獲其珍奇異物及諸委積
不可勝數自古帝王雖云即序西戎有如指注不能控
引也朕今手把而有之如何浩上書稱美遂命度歸鎮

撫其人初鳩尸卑鄣走山中猶觀城不拔得還其國既見盡為度歸所尅乃奔龜茲龜茲以其壻厚待之周保定四年其王遣使獻名馬隋大業中其王龍突騎支遣使貢方物是時其國勝兵千餘人而已

龜茲國在尉犁西北白山之南一百七十里都延城漢時舊國也去代一萬二百八十里其王姓白即後涼呂光所立白震之後其王頭繫綵帶垂之於後坐金獅子床所居城方五六里其刑法殺人者死劫賊則斷其一

臂并刖一足賦稅準地徵租無田者則稅銀風俗婚姻喪葬物產與焉耆略同惟氣候少溫為異又出細鹽饒銅鐵鈷礬皮氍毹沙鹽綠雌黃胡粉安息香良馬犉牛等東有輪臺即漢貳師將軍李廣利所屠者其南三百里有大河東流號計戌水即黃河也東去焉耆九百里南去于闐一千四百里西去疏勒一千五百里北去突厥牙六百餘里東南去瓜州三百里其東開城戍寇竊非一太武詔萬度歸率騎一千以擊之龜茲遣烏鵲目

提等領兵三千距戰度歸擊走之斬二百餘級大獲駝
馬而還俗性多姪置女市收男子鐵以入官土多孔雀
羣飛山谷間人取而食之孳乳如雞鶩其王家恒有千
餘隻云其國西北大山中有如膏者流出成川行數里
入地狀如餚餌甚臭服之髮齒已落者能令更生癟人
服之皆愈自後每使朝貢周保定元年其王遣使來獻
隋大業中其王白蘇尼哩遣使朝貢方物是時其國勝
兵可數千人

姑默國居南城在龜茲西去代一萬五百里役屬龜茲
溫宿國居溫宿城在姑默西北去代一萬五百五十里
役屬龜茲

尉頭國居尉頭城在溫宿北去代一萬六百五十里役
屬龜茲

烏孫國居赤谷城在龜茲西北去代一萬八十里其國
數為蠕蠕所侵西徙葱嶺山中無城郭隨畜牧逐水草
太延三年遣使者董琬等使其國後每使朝貢闕三字

疏勒國在姑默西白山南百餘里漢時舊國也去代一萬一千二百五十里文成末其王遣使送釋迦牟尼佛袈裟一長二丈餘帝以審是佛衣應有靈異遂燒之以驗虛實置於猛火之上經日不然觀者莫不悚駭心形俱肅其王戴金師子冠土多稻粟麻麥銅鐵錫鵝黃每歲常供送於突厥其都城方五里國內有大城十二小城數十人手足皆六指產子非六子者即不育勝兵者二千人南有黃河西帶葱嶺東去龜茲千五百里西去

鐸汗國千里南去朱俱波八九百里東北至突厥牙千
餘里東南去瓜州四千六百里

悅般國在烏孫西北去代一萬九百三十里其先匈奴
北單于之部落也為漢車騎將軍竇憲所逐北單于度
金微山西走康居其羸弱不能去者住龜茲北地方數
千里衆可二十餘萬涼州人猶謂之單于王其風俗言
語與高車同而其人清潔於胡俗翦髮齊眉以飾餽塗
之昱昱然光澤日三澣漱然後飲食其國南界有大山

山傍石皆燒鎔流地數十里乃凝堅人取以為藥即石
流黃也與蠕蠕結好其王嘗將數千人入蠕蠕國欲與
大檀相見入其界百餘里見其部人不浣衣不絆髮不
洗手婦人口舐器物王謂其從臣曰汝曹誰我將我入
此狗國中乃馳還大檀遣騎追之不及自是相仇讎數
相征討真君九年遣使朝獻并送幻人稱能割人喉脈
令斷擊人頭令骨陷皆血出或數升或盈斗以草藥內
其口中令嚼咽之湏臾血止養瘡一月復常又無痕瘢

世疑其虛乃取死罪囚試之皆驗云中國諸名山皆有
此草乃使人受其術而厚遇之又言其國有大術者蠕
蠕來抄掠術人能作霖雨育風大雪及行潦蠕蠕凍死
漂亡者十二三是歲再遣使朝貢求與官軍東西齊契
討蠕蠕太武嘉其意命中外諸軍戒嚴以淮南王他為
前鋒襲蠕蠕仍詔有司以其鼓舞之節施於樂府自後
每使朝貢

者至拔國都者至拔城在疏勒西去代一萬一千六百

二十里其國東有藩賀邯山出美鐵及師子

迷密國都迷密城在者至拔西去代一萬二千一百里
正平元年遣使獻一峯黑橐駒其國東有山名郁悉滿
山出金玉亦多鐵

悉萬斤國都悉萬斤城在悉密西去代一萬二千七百
二十里其國南有山名伽色邯山出師子每使朝貢

忸密國都忸密城在悉萬斤西去代二萬二千八百二

十八里

洛邏國故大宛國也都貴山城在疏勒西北去代萬四千四百五十里太和三年遣使獻汗血馬自此每使朝貢

粟特國在葱嶺之西故名奄蔡一名溫邏沙居於大澤在康居西北去代一萬六千里先是匈奴殺其王而有其國至王忽倪已三世矣其國商人先多詣涼土販貨及魏克姑臧悉見虜文成初粟特王遣使請贖之詔聽焉自後無使朝獻周保定四年其王遣使貢方物

波斯國都宿利城在忸密西古條支國也去代二萬四千二百二十八里城方十里戶十餘萬河經其城中南流土地平正出金鍮石珊瑚琥珀車渠馬腦多大真珠頗梨琉璃水精瑟瑟金剛火齊鎔鐵銅錫朱砂水銀綾錦疊駢氍毹亦麞皮及薰六鬱金蘇合青木等香胡椒草撥石蜜千年棗香附子訶梨勒無食子鹽綠雌黃等物氣候暑熱家自藏冰地多沙磧引水溉灌其五穀及鳥獸等與中夏略同惟無稻及黍稷土出名馬大

驢及駝往往有一日能行七百里者富室至有數千頭
又出白象師子大鳥卵有鳥形如橐駝有兩翼飛而不
能高食草與肉亦能噉人其王姓波氏名斯坐金羊牀
戴金花冠衣錦袍織成被飾以真珠寶物其俗丈夫翦
髮戴白皮帽貫頭衫兩箱近下開之亦有巾被緣以織
成婦女服大衫披大帔其髮前為髻後披之飾以金銀
花仍貫五色珠絡之於脰王於其國內別有小牙十餘
所猶中國之離宮也每年四月出遊處之十月仍還王

即位以後擇諸子內賢者密書其名封之於庫諸子及大臣莫之知也王死衆乃共發書視之其封內有名者即立以為王餘子出各就邊任兄弟更不相見也國人號王曰鑿嘴妃曰防步率王之諸子曰殺野大官有摸胡壇掌國內獄訟泥忽汗掌庫藏開禁地早掌文書及衆務次有遏羅訶地掌王之內事薛波敦掌四方兵馬其下皆有屬官分統其事兵有甲稍圓排劔弩弓箭戰乘乘象百人隨之其刑法重罪懸諸竿上射殺之次則

繫獄新王立乃釋之輕罪則劓刖若髡或翦半鬢及繫
牌於項以為恥辱犯強盜繫之終身姦貴人妻者男子
流婦人割其耳鼻賦稅則準地輸銀錢俗事火神天神
文字與胡書異多以姊妹為妻妾自餘婚合亦不擇尊
卑諸夷之中最為醜穢矣百姓女年十歲以上有姿貌
者王收養之有功勲人即以分賜死者多棄屍於山一
月着服城外有人別居惟知喪葬之事號為不淨人若
入城市搖鈴自別以六月為歲首尤重七月七日十二

月一日其日庶人以上各相命召設會作樂以極懽娛
又每年正月二十日各祭其先死者神龜中其國遣使
上書貢物云大國天子天之所生願日出處常為漢中
天子波斯國王居和多千萬敬拜朝廷嘉納之自此每
使朝獻恭帝二年其王又遣使獻方物隋煬帝時遣雲
騎尉李昱使通波斯尋使隨昱貢方物

伏盧尼國都伏盧尼城在波斯國北去代二萬七千三
百二十里累石為城東有大河南流中有鳥其形似人

亦有如橐駕馬者皆有翼常居水中出水便死城北有
云尼山出銀珊瑚琥珀多師子

色知顯國都色知顯城在悉萬斤西北去代一萬二千
九百四十里土平多五果

伽色尼國都伽色尼城在悉萬斤南去代一萬二千九
百里土出赤鹽多五果

薄知國都薄知城在伽色尼國南去代一萬三千三百
二十里多五果

牟知國都牟知城在忸密西南去代二萬二千九百二十里土平禽獸草木類中國

阿弗太汗國都阿弗太汗城在忸密西去代二萬三千七百二十里土平多五果

呼似密國都呼似密城在阿弗太汗西去代二萬四千七百里土平出銀琥珀有師子多五果

諾色波羅國都波羅城在忸密南去代二萬三千四百

二十八里土平宜稻麥多五果

早伽至國都早伽至城在忸密西去代二萬三千七百
二十八里土平少田殖取稻麥於隣國有五果

伽不單國都伽不單城在悉萬斤西北去代一萬二千
七百八十里土平宜稻麥有五果

者舌國故康居國在破洛那西北去代一萬五千四百
五十里太延三年遣使朝貢不絕

加倍國故休密翎侯都和墨城在莎車西去代一萬三
千里人居山谷間

折薛莫孫國故雙靡翎侯都雙靡城在加倍西去代一

萬三千五百里居山谷間

鉗敦國故貴霸翎侯都護潔城在折薛莫孫西去代一

萬三千五百六十里居山谷間

弗敵沙國故盼頓翎侯都薄茆在鉗敦西去代一萬三

千六百六十里居山谷間

闔浮謁國故高附翎侯都高附城在弗敵沙南去代一

萬三千七百六十里居山谷間

大月氏國都勝監氏城在弗敵沙西去代一萬四千五百里北與蠕蠕接數為所侵遂西徙都薄羅城去弗敵沙二千一百里其王寄多羅勇武遂興師越大山南侵北天竺自乾陀羅以北五國盡役屬之太武時其國人商販京師自云能鑄石為五色瑠璃於是採礦山中於京師鑄之既成光澤乃美於西方來者乃詔為行殿容百餘人光色映徹觀者見之莫不驚駭以為神明所作自此國中瑠璃遂賤人不復珍之

安息國在葱嶺西都蔚搜城北與康居西與波斯相接
在大月氏西北去代二萬一千五百里周天和二年其
王遣使朝獻

條支國在安息西去代二萬九千四百里

大秦國一名犁軒都安都城從條支西渡海曲一萬里
去代三萬九千四百里其海滂出猶渤海也而東西與
渤海相望蓋自然之理地方六千里居兩海之間其地
平正人居星布其都王城分為五城各方五里周六十

里王居中城城置八臣以主四方而王城亦置八臣分
主四城若謀國事及四方有不決者則四城之臣集議
所王自聽之然後施行王三年一出觀風化人有冤枉
詣王訴訟者當方之臣小則譴責大則黜退令其舉賢
人以代之其人端正長大衣服車旗擬儀中國故外域
謂之大秦其土宜五穀桑麻人務蠶田多璆琳琅玕神
龜白馬朱鬚明珠夜光璧東南通交趾又水道通益州
永昌郡多出異物大秦西海水之西有河河南南流河

西有南北山山西有赤水西有白玉山玉山西有西王母山玉為堂室云從安息西界循海曲亦至大秦廻萬餘里於彼國觀日月星辰無異中國而前史云條支西行百里日入處失之遠矣

阿鈎羌國在莎車西南去代一萬三千里國西有縣度山其間四百里中往往有棧道下臨不測之深人行以繩索相持而度因以名之土有五穀諸果市用錢為貨止立宮室有兵器土出金珠

波路國在阿鈞羌西北去代一萬三千九百里其地濕熱有蜀馬土平物產國俗與阿鈞羌同類焉

小月氏國都富樓沙城其王本大月氏王寄多羅子也寄多羅為匈奴所逐西徙後令其子守此城因號小月氏焉在波路西南去代一萬六千六百里先居西平張掖之間被服頗與羌同其俗以金銀錢為貨隨畜牧移徙亦類匈奴其城東十里有佛塔周三百五十步高八十丈自佛塔初建計至武定八年八百四十二年所謂

百丈佛圖也

罽賓國都善見城在波路西南去代一萬四千二百里居在四山中其地東西八百里南北三百里地平溫和有苜蓿雜草奇木檀槐梓竹種五穀糞園田地下濕生稻冬食生菜其人工巧雕文刻鏤織罽有金銀銅錫以為器物市用錢他畜諸國同每使朝獻

吐呼羅國去代一萬二千里東至范陽國西至患萬斤國中間相去二千里南至連山不知名北至波斯國中

間相去一萬里薄提城周匝六十里城南有西流大水
名漢樓河土宜五穀有好馬駝驃其王曾遣使朝貢
副貨國去代一萬七千里東至阿富汗使且國西至沒誰
國中間相去一千里南有連山不知名北至奇沙國相
去一千五百里國中有副貨城周匝七十里宜五穀蒲
桃惟有馬駝驃國王有黃金殿殿下有金駘七頭各高
三尺其王遣使朝貢

南天竺國去代三萬一千五百里有伏醜城周匝十里

城中出摩尼珠珊瑚城東三百里有拔賴城城中出黃
金白真檀石蜜蒲桃土宜五穀宣武時其國王婆羅化
遣使獻駿馬金銀自此每使朝貢

疊伏羅國去代三萬一千里國中有忽患城城北有鹽
奇水西流有白象并有阿末黎木皮中織作布土宜五
穀宣武時其國王伏陁末多遣使獻方物自是每使朝
貢

拔豆國去代五萬一千里東至多勿當國西至旃那國

中間相去七百五十里南至罽陵伽國北至弗那伏且
國中間相去九百里國中出金銀雜寶白象水牛駢牛
蒲桃五果土宜五穀

嚙噃國大月氏之種類也亦曰高車之別種其原出於
塞北自金山而南在於闐之西都烏許水南二百餘里
去長安一萬一百里其王都拔底延城蓋王舍城也其
城方十里餘多寺塔皆飾以金風俗與突厥略同其俗
兄弟共一妻夫無兄弟者妻戴一角帽若有兄弟者依

其多少之數更加帽焉衣服類加以纓絡頭皆翦髮其語與蠕蠕高車及諸胡不同衆可有十萬無城邑依隨水草以氈為屋夏遷涼土冬逐煖處分其諸妻各在別所相去或二百三百里其王巡歷而行每月一處冬寒之時三月不徙王位不必傳子子弟堪者死便受之其國無車有輿多駝馬用刑嚴急偷盜無多少皆要斬盜一責十死者富家累石為藏貧者掘地而埋隨身諸物皆置塚內其人凶悍能鬪戰西域康居于闐沙勒安息

及諸小國三十許皆役屬之號為大國與蠕蠕婚姻自
太安以後每遣使朝貢正光末遣貢師子一至高平遇
万俟醜奴反因留之醜奴平送京師永熙以後朝獻遂
絕初熙平中明帝遣賸伏子統宋雲沙門法力等使西
域訪求佛經時有沙門慧生者亦與俱行正光中還慧
生所經諸國不能知其本末及山川里數蓋舉其略云
至大統十二年遣使獻其方物廢帝二年周明帝二年
並遣使來獻後為突厥所破部落分散職貢遂絕至隋

大業中又遣使朝貢方物其國去漕國千五百里東去
瓜州六千五百里

朱居國在於闐西其人山居有麥多林果咸事佛語與
于闐相類役屬嚙咤

渴槃陀國在葱嶺東朱駒波西河經其國東北流有高
山夏積霜雪亦事佛道附於嚙咤

鉢和國在渴槃陀西其土尤寒人畜同居穴地而處又
有大雪山望若銀峯其人惟食餅麩飲麥酒服氈裘有

二道一道西行向嚙咤一道西南趣烏長亦為嚙咤所
統

波知國在鉢和西南土狹人貧依託山谷其王不能總
攝有三池傳云大池有龍王次者有龍婦小者有龍子
行人經之設祭乃得過不祭多遇風雪之困

賒彌國在波知之南山居不信佛法專事諸神亦附嚙
咤東有鉢盧勒國路嶮緣鐵瑣而度下不見底熙平中
宋雲等竟不能達

烏萇國在賒彌南北有葱嶺南至天竺婆羅門胡為其上族婆羅門多解天文吉凶之數其主動則訪決焉土多林果引水灌田豐稻麥事佛多諸寺塔極華麗人有爭訴服之以藥曲者發狂直者無恙為法不殺犯死罪惟徙於靈山西南有檀特山山上立寺以驢數頭運食山下無人控御自知往來也

乾陁國在烏萇西本名業波為嚙咤所破因改焉其王本是敕勒臨國已二世矣好征戰與罽賓鬪三年不罷

人怨苦之有鬪象七百頭十人乘一象皆執兵仗象鼻
縛刀以戰所都城東南七里有佛塔高七十丈周三百
步即謂雀離佛圖也

康國者康居之後也遷徙無常不恒故地自漢以來相
承不絕其王本姓溫月氏人也舊居祁連山北昭武城
因被匈奴所破西踰葱嶺遂有國枝庶各分王故康國
左右諸國並以昭武為姓示不忘本也王字世夫畢為
人寬厚甚得衆心其妻突厥達度可汗女也都於薩寶

水上阿祿廸城多人居大臣三人共掌國事其王素冠七寶花衣綾羅錦繡白疊其妻有髮幪以皂巾丈夫翦髮錦袍名為彊國西域諸國多歸之米國史國曹國何國小安國那色波國烏那曷國穆國皆歸附之有胡律置於祆祠將決罰則取而斷之重者族次罪者死賊盜截其足人皆深目高鼻多髯善商賈諸夷交易多湊其國有大小鼓琵琶五絃箜篌婚姻喪制與突厥同國立祖廟以六月祭之諸國皆助祭奉佛為胡書氣候溫宜

五穀勤脩園蔬樹木滋茂出馬駕驢犁牛黃金砌沙畱
香阿薩那香瑟瑟麞皮氍毹錦疊多蒲桃酒富家或致
千石連年不敗大業中始遣使貢方物後遂絕焉

安國漢時安息國也王姓昭武氏與康國王同族字設
力妻康國王女也都在那密水南城有五重環以流水
宮殿皆平頭王坐金駕座高七八尺每聽政與妻相對
大臣三人評理國事風俗同於康居惟妻其姊妹及母
子遞相禽獸此為異也隋煬帝即位遣司隸從事杜行

滿使西域至其國得五色鹽而返國西百餘里有卑國可千餘家其國無君長安國統之大業五年遣使貢獻石國居於藥殺水都城方十餘里其王姓石名涅國城東南立屋置座於中正月六日以王父母燒餘之骨金甕盛置牀上巡遠而行散以花香雜果王率臣下設祭焉禮終王與夫人出就別帳臣下以次列坐享宴而罷有栗麥多良馬其俗善戰會貳於突厥射匱可汗滅之令特勒甸職攝其國事南去鐵汗六百里東南去瓜州

六千里甸職以隋大業五年遣使朝貢後不復至

女國在葱嶺南其國世以女為王姓蘇毗字末羯在位二十年女王夫號曰金聚不知政事國內丈夫惟以征伐為務山上為城方五六里人有萬家王居九層之樓侍女數百人五日一聽朝復有小女王共知國政其俗婦人輕丈夫而性不妬忌男女皆以彩色塗面而一日中或數度變改之人皆被髮以皮為鞋課稅無常氣候多寒以射獵為業出鎔石朱砂麝香翠牛駿馬蜀馬尤

多鹽恒將鹽向天竺興販其利數倍亦數與天竺党項
戰爭其女王死國中厚斂金錢求死者族中之賢女二
人一為女王次為小王貴人死剥皮以金屑和骨肉置
甕中埋之經一年又以其皮肉鐵器埋之俗事阿脩羅
神又有樹神歲初以人祭或用獮猴祭畢入山祝之有
一鳥如雌雉來集掌上破其腹視之有衆粟則年豐沙
石則有災謂之鳥卜隋開皇六年遣使朝貢後遂絕
鑄汗國都葱嶺之西五百餘里古渠搜國也王姓昭武

字阿利柒都城方四里勝兵數千人王坐金羊牀妻戴
金花俗多朱砂金鐵東去疏勒千里西去蘇對沙那國
五百里西北去石國五百里東北去突厥可汗二千餘
里東去瓜州五千五百里隋大業中遣使貢方物

吐火羅國都葱嶺西五百里與挹怛雜居都城方二里
勝兵者十萬人皆善戰其俗奉佛兄弟同一妻迭寢焉
每一入房戶外掛其衣以為志生子屬其長兄其山
穴中有神馬每歲牧馬於穴所必產名駒南去漕國千

七百里東去瓜州五千八百里大業中遣使朝貢

米國都那密水西舊康居之地無王其城主姓昭武康
國王之支庶字閉拙都城方二里勝兵數百人西北去
蘇對沙那國五百里西南去史國二百里東去瓜州六
千四百里大業中頻貢方物

史國都獨莫水南十里舊康居之地也其王姓昭武字
狄遮亦康國王之支庶也都城方二里勝兵千餘人俗
同康國北去康國二百四十里南去吐火羅五百里西

去那色波國二百里北去米國二百里東北去米國二百里東去瓜州六千五百里大業中遣使貢方物曹國都那密水南數里舊是康居之地也國無主康國王令子烏建領之都城方三里勝兵千餘人國中有得悉神自西海以東諸國並敬事之其神有金人破羅闊人丈有五尺高下相稱每日以駝五頭馬十四羊一百口祭之常有數千人食之不盡東南去康國百里西去何國百五十里東去瓜州六千六百里大業中遣使貢

方物

何國都那密水南數里舊是康居地也其王姓昭武亦康國王之族類字敦都城方二里勝兵者千人其王坐金羊座東去曹國百五十里西去小女國三百里東去瓜州六千七百五十里大業中遣使貢方物

烏那遏國都烏許水西舊安息之地也王姓昭武亦康國王種類字佛食都城方二里勝兵數百人王坐金羊座東北去安國四百里西北去穆國二百餘里東去瓜

州七千五百里大業中遣使貢方物

穆國都烏滸河之西亦安息之故地與烏那遏為隣其王姓昭武亦康國王之種類也字阿濫密都城方三里勝兵二千人東北去安國五百里東去烏那遏二百餘里西去波斯國四千餘里東去瓜州七百里大業中遣使貢方物

漕國在葱嶺之北漢時羈賓國也其王姓昭武字順達康國王之宗族也都城方四里勝兵者萬餘人國法嚴

殺人及賊盜皆死其俗重淫祠葱嶺山有順天神者儀制極華金銀鏤為屋以銀為地祠者日有千餘人祠前有一魚脊骨有孔中通馬騎出入國王戴金牛頭冠坐金馬座多稻粟豆麥饒象馬犂牛金銀鏹鐵駢駢朱沙青黛安息青木等香石蜜黑鹽阿魏沒藥白附子北去帆延七百里東去刦國六百里東北去瓜州六千六百里大業中遣使貢方物

論曰自古開遠夷通絕域必因宏放之主皆起好事之

臣張騫鑿空於前班超投筆於後或結之以重寶或餽
之以利劒投軀萬死之地以要一旦之功皆由主尚來
遠之名臣徇輕生之節是知上之所好下必効焉西域
雖通於魏氏於時中原始平天子方以混一為心未遑
及此其信使往來得羈縻勿絕之道及隋煬帝規摹宏
侈掩吞秦漢裴矩方進西域圖記以蕩其心故萬乘親
出玉門闕置伊吾且末鎮而闕右暨於流沙騷然無聊
生矣若使北狄無虞東夷告捷必將脩輪臺之戍築烏

壘之城求大秦之明珠致條支之鳥卵往來轉輸將何以堪其弊哉古者哲王之制也方五千里務安諸夏不事要荒豈威不能加德不能被蓋不以四夷勞中國不以無用害有用也是以秦戍五嶺漢事三邊或道殣相望或戶口減半隋室恃其強盛亦狼狽於青海此皆一人失其道故億兆罹其苦戴思即叙之義固辭都護之請返其千里之馬不求白狼之貢則七戎九夷候風重譯雖無遼東之捷豈及江都之禍乎案西域開於往漢

年世積久雖離併多端見聞殊說此所以前書後史躋
駁不同豈其好異地遠故也人之所知未若其所不知
信矣但可取其梗概夫何是非其間哉

北史卷九十七

北史卷九十七考證

鄯善國傳至太延初始遣其弟素延者入侍○者魏書
作者

且末國傳其風迅駛斯須過盡○駛監本訛駛今改從

南本

高昌傳後至隋時城有十八○監本缺後字今從南本

增入

姑默國傳姑默國居南城在龜茲西○默一本作默

阿鈞羌國傳阿鈞羌國在莎車西南○鈞監本作鈞今
從閣本

康國傳其王素冠七寶花○素冠七寶花魏書作索髮
冠七寶金花

北史卷九十七考證

謹案第二十二頁前二行飛而不能高刊本不訛

下令改

欽定四庫全書



欽定四庫全書





覆校官編修臣劉種之

校對官檢討臣王鍾健

謄錄監生臣王心仁